

Qinersinissamik suaaruteqareernerup kingorna Naalakkersuisuugallartut sulinerannut malittarisassat

Qinersisoqarnissaanik suaaruteqarneq

1. Inatsisartunut immikkut ittumik qinersinissaq pillugu Inatsisartut inatsisaat nr. 1, 18. februar 2021-meersaq naapertorlugu ulloq 6. april 2021-mi Inatsisartut qinersisoqassaaq.

1.1. Malittarisassat uku Inatsisartunit Naalakkersuisunik nutaanik qinersinissamut atorneqassapput.

Naalakkersuisuugallartut sulinerat

2. Naalakkersuisut suliatik ingerlatiinnarsinnaavaat 2021-mut aningaasanut inatsit naapertorlugu piginnaatinneqarnertik tunngavigalugu taamaaliornikkullu suleriaatsit akornuserneqannginnissaat qulakkeerneqassalluni.

2.1. Naalakkersuisut immikkut piginnaatitaanerit Inatsisartut immikkut ittumik qinersinissamut atatillugu tunniunneqarsimasaq inatsimmi tassannga aalajangersakkat nassuiaatillu malillugit ingerlanneqassapput.

3. Naalakkersuisuugallartut pissutsit politikikkut aalajangiiffigisinnaangilaat, soorlu atorfilittat allaffissornikkut aalajangiiffigissassanik annertuunik tunngaviatigut aalajangiussaqaarsinnaangitsut.

3.1. Naalakkersuisut angalasinnaangillat, nunatta soqutigisai sinnerlugit taamaaliussanngippata.

4. Imm. 2 aamma 3 naapertorlugit piginnaatitaanerit nalornissutigineqarpata suliaq Naalakkersuisut Siulittaasuata Naalakkersuisoqarfianut nalilersorneqartussanngorlugu saqqummiunneqarsinnaavoq.

4.1. Naalakkersuisut Siulittaasuata Naalakkersuisoqarfianut nalornissut saqqummiunneqarpata saqqummiussami ilaatinneqassapput isummerfissamut nassuiaat kiisalu naalakkersuisoqarfiup aaqqiissutissatut siunnersuutaa.

Ataatsimiigiarnernut peqataasarnissaq

5. Naalagaaffimmi oqartussanik, nunanik allanik, kattuffinnik nunanit tamalaaneersunit il.il. peqataalluni ataatsimeeqatiginissaat tunuarsimaarfigineqassaaq.

5.1. Ataatsimiinnerut peqataaneq atorfilittanit isumagineqassaaq, ataatsimiinnerup sulialluunniit ilusaata politikerinit peqataaffigineqarnissaa pisariaqartilinggippassuk, taamaattoq takuuk imm. 3.

5.2. Ataatsimiinnerni peqataanermi tunuarsimaartoqassaaq qinersinissamik suaaruteqarsimaneq innersuussutigalugu.

Pilersaarutininik aallartereersunik ingerlatseqqinneq

6. Naalakkersuisut pilersaarutininik aallartereersimasunik sulinertik teknikikkut ingerlatiinnassavaat, matumani pilersaarutit aallartereersimasut nr. 5-imi eqqaaneqartunik suleqateqarnermi.

Tusagassiuutinit saaffiginnissutit tusagassiortunullu saaffiginninnerit

7. Tusagassiuutinit saaffiginnissutit naalakkersuisoqarfimmi pisortamut innersuunneqartassapput.

7.1. Pissutsit piviusut imaluunniit paasissutissat qinersinissamik suaaruteqannginnermi tamanut saqqummiunneqarsimasut pillugit paasissutissat taamaallaat tusagassiorfinnut ingerlateqqinneqarsinnaapput.

7.2. Tusagassiorfinnut nalunaarutit naalakkersuisoqarfinnit pisortanit taamaallaat nassiunneqarsinnaapput naalakkersuinerimullu tunngasuussanatik.

Atorfinitsitsineq soraarsitsinerlu

8. Naalakkersuisut allaffissornermi qullersanik atorfinitsitsisinnaanngillat soraarsitsisinnaanatiluuunniit, ataatsimiititaliorsinnaanatik, isumalioqatigiissitaliorsinnaanatik il.il.

§ 37 naapertorlugu apeqqutit

9. Inatsisartunut ilaasortanit Inatsisartut suleriaasianni § 37 naapertorlugu apeqquteqaatit akissuteqarfigineqassanngillat.

9.1. § 37 naapertorlugu apeqquteqartoq naalakkersuisoqarfimmi akisussaasunit ilisimatinneqartassaaq apeqqutigineqartut pillugit akissuteqartoqarsinnaanngimmat.

Avammut attaveqaqatigiinneq

10. Suliffeqarfinnik, kattuffinnik, innuttaasunik il.il. attaveqaqatigiinnerit pisarnertut nalinginnaasumik akineqartassapput.

10.1. Akissuteqaatit allaffissornikkut atorfilittanit suliarineqartassapput immikkoortuni akisussaasunit qinersisoqarnissaanik suaaruteqarneq innersuussutigalugu.

10.2. Akissuteqaatit aallaaviatigut pissutsinut piviusunut taamaallaat imaqartassapput.

Tamanut ammasumik tusarniaanerin

11. Inatsisartut inatsisissaannut, nalunaarutinit, nassuiaatinut il.il. siunnersuutininik tamanut nutaanik tusarniaasoqassanngilaq.

11.1. Tusarniaassutit nassiunneqareersut piffissaliussap iluani naammassineqassapput.

11.2. Inatsisit pitsaassusaannik qulakkeerinninnissaq Inatsisilerivimmit pisarnertut ingerlanneqassaaq.

Naalakkersuisut Siulittaasuata Naalakkersuisoqarfia, 18. februar 2021

Hans-Peder Barlach Christensen (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut